

Bájkkeavijssa NuorttaSálto

Luonndoiellem kulturmujtto-duobddágijn



Tæksta: Børge Strandskog
Járggálibme: Divate Media AS/Idar Kintel

ÁLLIM. Barggojuogos álli bargujn Muvrrájvren. FERDIG. Arbeidsgjengen avslutter jobben på Røysvatn.

■ Grenseleden/Rádjebálges/Gränsleden ásaduváj ádá EU-prosjevtá baktu gánná vuonarijka, sáme ja sveriga almulasj instánsa oassálasstin. Dálla li guokta ádá lávdagoade sadjáj bohtám rádjebálggá milta vuona bielen.

Rádjebálges lij álgos Oarjjevuonas Divtasvuonan Áhkkájávrráj Jielleváren, valla maññela guhkeuváj goappátjij gietjijn ja le uddni aj Jággásjidas Ríjttsemij, gæjnoj 8,2 mijla guhke. Vájaldimbálges rassti Nordlándabálggáv ja vaddá navti moadda máhttelisvuodajt vájaldimijda oarjás ja nuortas.

Aktisasjprosjækta Divtasvuona ja Jielleváre suohkanij ja Unna Tjerusj sámesijda gaskan álgaduváj tjavtjan

2002. Bårggemánon 2007 Rádjebálges almulatjtat rabáduváj. Dat rájes le læhkám avtaráják ávdánahttembarggo. Dálla ájggu gæhttjaladdat lávdagoadev muoras (Risstin-lávda) muhtem sajijn bálggá milta. Prosjækta, gánná le mierre 324.000 kr, le aktisasjibarggo Divtasvuona suohkana ja Anne Kalstad Mikkelsena baktu, guhti le Risstin-loavddagav ávdánahttam. Nordlánd fylkkasuohkan le prosjevtav doarjodam 130.000 krávnáj, STH-ráde 100.000 ja

Divtasvuona suohkan 94.000 krávnáj.

Ávdutjis li gálmma dábe tsieggiduvvam vuona bielen bálggá milta. Dá giese guokta Risstin-loavddaga várráj doalvoduvvin, Anders-gárde guoran ja Muvrrájávve lahka. Svein Berg le jádedum bargov váren dá giese. Sån le aj læhkám ájnas bargon Rádjebálggájn moadda jage.

- Sihke loavddaga ja vuorkudagá buvtaduvvin Vuodnabadán ja háleduvvin helikopterijn. Majt vierttip dahkat le guolbev ja vuonájt biedjat. Muorribergas le juo sajen, javllá Berg. Ratjik Gásluovtas jáhkká Rádjebálggán li stuorra vejulasjuoda.

- Rádjebálges tjadná guokta rijkajt ja gálmma kultuvrajt aktij, ja hiebadahhtá vaj ienep ulmutja bessi ávkálasstet dav valjes luonndo- ja kulturhistávrrálasj duobddágav mij le váren. Bálggá li buoragit mierkkidum ja máhtti aneduvvat giesse dálvve. Dálla lip aj oadtjum ádá ja rievddadum kártav, subtsas sån.

Stig Eriksen le lávda-prosjevtá jádediddje. Sån nannusit jáhkká prosjækta sjaddá oassálasstet ælládahttemij kulturduobddágis ja ekonomalasj árvvoháhkubmáj. - Vuosedime baktu dajs kultur- ja luonndoárvojs bálggá duobddágijn, de gæhttjalip berustimev báktet luonndoiellemij guovlon. Jus kulturmujtojt bárrusij oadtjop, oassálasstet aj bisodittjat dav diedov mij gullu birrusij. Barggap duodastahthemijn bálggá histávrrás, dajt bátsudisájs ulmutjij majt vilá máhttepp vuojnnet, ja dav diedov dajsta ja daj birra gudi li árrum dánná, javllá Eriksen. Sån miejnne aj prosjækta tjadná sáme

tsieggimdábijt histávrrálasj ja anedum vájaldimbálggájda buorre láhkáj.

- Risstin-lávda vuodo le árbbedábálasj lávda, sæmme báttá gá aktit udnásj dárbojt. Prosjækta máhttá dan diehti oassálasstet sihkarastátjijt ja ávdánahtátjijt sáme árbbedábálasj diedojt sáme tsieggimvuogij birra. Dá li tsieggimvuoge ma li gáhtomin, miejnne Stig Eriksen.

Divtasvuodna ja Nuortta-Sálto le árbbedábálasj sáme duobddák, gánná sáme li viessum ællosujtos, guollimis, bivddemis, ednambargos ja tjoahkkeæládusájs. Tsiekkadusá ja árromsaje dálen lidjin hiebaduvvam dalusj iellemij. Lávdagoade, gámá, skiejá ja njalla lidjin dábasj sáme tsiekkadusá. Valla diehto daj birra ja ano birra Nuortta-Sálton le vargga gáhtum. Dát le vuosstebiellem sáme guovlojda sveriga bielen rájás. Jus maná bijtám- ja julevsáme guovlojda sveriga bielen máhtá vuojnnet dalusj tsiekkadusá li ábdddiduvvam ja várajda váldeduvvam. Duodden moadda ádá sáme tsiekkadusá aneduvvi.

- Prosjevtá vuodo le lahkavuohta luonnduj, sáme kulturduobddága ja sierralágásj luonndomuossádime. Sæmme bále sáme tsiekkadusá sjaddi bájnneit duobddágav ja vuojnnesij bohtet riekta láhkáj. Gá dalusj árbbedábe aktiduvvi ádá dárbojt de jáhkket dát dárkes identitehtav ávdeditjtat, tsiekkadusáj baktu lahkabirrusin. Prosjækta navti oassálasstá soaptsomav ávdeditjtat sáme arkitektuvra baktu, hæjtá Eriksen.



VUORDDI. Barggojuogos gárvet duostotjijt Risstin-loavddagav Andersgárde lahka. VENTER. Her forberede arbeidslaget seg til å ta imot Risstin-lavoen ved Andersgjerdet.